

माओ त्से तुंग

चीन समाज ता वर्ग विश्लेषण

मार्च 1926

इद लेख किन कामरेड माओ त्सेतुंग पार्टी लोप्पा मत्ता रेंडु भटके कियाना रुझान कुना विरोध कियाला काजे राससी मत्तोर। पहला रुझान ता प्रतिनिधित्व छन-तू-शू कींदुर, ओरू सिर्फ क्वोमिंगतांग किन सहायता कियाना पोरो ध्यान हींदुर ओसो किसानालोर किन मरंगिंदुर। इदेन किने दक्षिणपंथी अवसरवाद इंतोर। दूसरा रुझान ता प्रतिनिधित्व चांग-क्वो-थाओ कींदुर, वेर सिर्फ मजदूर आंदोलन पोरोने ध्यान हियानोर ओसो ओरू वेन्ने किसान लोरकिन मरंगिंदुर। इदेन किन वामपंथी अवसरवाद इंतोर। मति रेंडों अवसरवादी ग्रुप क्रांतिकारी पक्ष ता ताकत हालो इंजी पुंजी मंतोर, मति ओरू पूना ताकत ओसो विशाल संश्रयकारी (allies) जन-समुदाय किन बेगाडल दोरकी किमुइंता इंजी पुनवा मत्तोर। कामरेड माओ किसान लोरकिन चीन सर्वहारा वर्ग ता सबसे ज्यादा संख्या मंदाना ओसो सबसे ज्यादा ईमानदार मंदाना संश्रयकारी आंदुर इंजी वेहतोर, ओसो इद्रम ओरू चीन क्रांति लोप्पा सबसे मुख्य संश्रयकारी बोरू इंदाना समस्या किन हल कितोर। इदिना संगेने राष्ट्रीय पूंजीपति वर्ग उंदी डुलमुल वर्ग मंदिता इंजी वेहतोर, ओसो वायाना कालम ता क्रांतिकारी उभार लोप्पा अद रेंड ग्रुप बनेमायर ओसो इदिना दक्षिण पक्ष साम्राज्यवाद संगे गोती कींता इंजी वेहतोर। 1927 ता घटनांग ओना समझादारी किन सही साबित किता।

मावा दुश्मन बोरू ओसो मावा दोस्त बोर आंदूर? इद सवाल क्रांति लोप्पा प्राथमिक महत्व ता सवाल आंदू। चीन लोप्पा हत्ता सब्बे क्रांतिकारी संघर्ष किन पक्काए कम सफलता दोरकतांग। तेना बुनियादी कारण बाता इत्तेके अणु तन्ना वास्तविक (असली) दुश्मन पोरो हमला कियाला काजे तन्ना वास्तविक (असली) दोस्तलोरा संगे एकता आया परवोंग आतांग। क्रांतिकारी पार्टी आम जनता ना नेतृत्व कींता, ओसो बद क्रांति ते क्रांतिकारी पार्टी आम जनता किन गलत हरींदे ओंता अद क्रांति बस्के सफल आया परवो। इद पोल्लो ता गरेंटी एतला काजे माटू मावा क्रांति लोप्पा आम जनता किन गलत हरींदे ओयवा लेवा, असली ता सफलता दोरकी कियाना, माकिन मावा असली दुश्मन

(वास्तविक) पोरो हमला कियाला काजे मावा असली दोस्त लोरा संगे एकता आयना बगिल वेल्ले ध्यान हियाना पाहिजे। वास्तविक दोस्त ओसो वास्तविक दुश्मन कुना नइमा मंदाणा अंतर (तेड़ा) किन पुंदाला काजे माटु चीन समाज ता अलग-अलग वर्ग ता आर्थिक परिस्थिति ओसो क्रांति बगिल ओरा तम्मा-तम्माक रुझान कुना आम विश्लेषण कियाना।

चीन समाज लोप्पा अलग-अलग वर्ग कुना परिस्थिति बदरम मंता?

जमींदार वर्ग ओसो दलाल-पूंजीपति वर्ग - आर्थिक रूप ते पेरेके अरता ओसो अर्ध-औपनिवेशिक चीन लोप्पा जमींदार वर्ग ओसो दलाल-पूंजीपति वर्ग अंतरराष्ट्रीय पूंजीपति वर्ग ता तोकर लेक्का मंदिता। अदु तन्ना अस्तित्व ओसो विकास काजे साम्राज्यवाद पोरो निर्भर आसी मंदिता। इव वर्गकु चीन ता सबसे पेरेके अरता ओसो प्रतिक्रियावादी उत्पादन-संबंध कुना प्रतिनिधित्व कींतांग। ओसो ताना उत्पादक शक्तिंग (Productive forces) ना विकास किन रोमी कींतांग। इविना अस्तित्व चीनी क्रांति ता उद्देश्य तल इनपडे अलग मंता। विशेष रूप ते बेहरा जमींदारी वर्ग ओसो बेहरा दलाल-पूंजीपति वर्ग, इव रेंडासी हमेशा साम्राज्यवादी पक्ष एतिंतांग। ओसो हमेशा प्रतिक्रांतिकारी ग्रूप लोप्पा संगठित आंतांग। इविना राजनीतिक प्रतिनिधि राजसत्तावादी¹ (Etatistes) ओसो क्वोमिंगतांग ता दक्षिण पक्ष आंदू।

मध्यम-पूंजीपति वर्ग- इद वर्ग शहर ओसो ग्रामीण इलाकांग लोप्पा चीन ता पूंजीवादी उत्पादन-संबंध कुना प्रतिनिधित्व कींता। मध्यम-पूंजीपति वर्ग इत्तेके मुख्य रूप ते राष्ट्रीय पूंजीपति वर्गे आंदू। चीनी क्रांति संबंध ते अद असंगत (Inconsistent) रुझान लागू कींता। अदु विदेशी पूंजी ता देब्बा ओसो युद्ध-सरदार लोरा उत्पीड़न संगे उत्पीड़ित आंता, अस्के तानकि क्रांति ता जरूरत आता लेक्का लागिंता। अस्के अद साम्राज्यवाद ओसो युद्ध-सरदार लोरा खिलाफ क्रांतिकारी आंदोलन ता पक्ष एतिंता। मति देश लोप्पा सर्वहारा वर्ग क्रांति लोप्पा जुझारू (डटे मासी) रूप ते शामिल आंता ओसो देश तल बाहर अंतरराष्ट्रीय सर्वहारा वर्ग इद क्रांति किन सक्रिय रूप ते सहायता कीतास्के, अद वर्ग किन उंदी वर्ग लेक्का मुन्ने हंजी पूंजीपति वर्ग ता स्तर एवनल एव्वना तन्ना

विचार विफल आयाना खतरा लेक्का लांगिता, अस्के अदु क्रांति पोरो डाउट कियाना शुरू कींता। राजनीतिक दृष्टि ते अद उंदी वर्ग, इत्तेके राष्ट्रीय पूंजीपति वर्ग ता शासन ते राजसत्ता निल्पी कियाना पक्ष ता समर्थन कींता। ताए ची-थाओ¹ तोर वरोर स्वयंभू “सच्चा विद्यार्थी” पेकिंग तल छपेमायना “छन पाओ”² ते इद्रम राससी मत्तोर: “मना दावड़ कै दा मुक्का साम्राज्यवाद किन वाटला काजे तेहाटु ओसो तिनड़ कै दा मुक्का कम्युनिस्ट पार्टी किन खत्म कियाला तेहाटु इंजी।” इद पोल्लो इद वर्ग ता हुलमुलपन ओसो समस्या किन तोहिंता। इद वर्ग किन क्वोमिंगतांग ता जन-जीविका (People’s Livelihood) सिद्धांत ता व्याख्या वर्ग-संघर्ष ता सिद्धांत अनुसार कियाना ता विरोध कींता। ओसो अद रूस संगे क्वोमिंगतांग ता दोस्ती कियाना ओसो क्वोमिंगतांग लोप्पा कम्युनिस्ट³ ओसो वामपंथी लोरकिन शामिल कियाना ता विरोध कींता। मति राष्ट्रीय पूंजीपति वर्ग ता शासन ते राजसत्ता निल्पी कियाना ताना लक्ष्य बिल्कुल अव्यवहारिक मंदिता। बारांकु इत्तेके दुनियाता वर्तमान परिस्थिति अद्रम मंता इत्तेके क्रांति ओसो प्रतिक्रांति, इव रेंडासी बेहरा ताकत कुना नडमा संघर्ष तेदसी मंदिता अनि इव रेंडासी रेंडु बेहरा झंडांग तेंहितांग। उंदी क्रांति ता लाल झंडा मंता अदिन किन तीसरी इंटरनेशनल पोरो तेहता ओसो दुनिया ता सब्बे रकम ता उत्पीडित वर्ग किन गोलबंद किया मंता, दूसरा प्रतिक्रांति ता पांडरी झंडा आंदू, अदिन किन लीग ऑफ नेशन्स पोरो तेहता अदु दुनिया ता सब्बे प्रतिक्रांतिकारी लोर किन गोलबंद किया मंता। अदिन काजे इद्रम कितेके मध्यम वर्ग तोड़फोड़ आयार अनि उंदी हिस्सा डावड़ कै बगिल हंजी क्रांतिकारी लोरा लोप्पा शामिल आयार ओसो दूसरा हिस्सा तिनड़ कै बगिल हंजी प्रतिक्रांतिकारी लोरा लोप्पा हंजी शामिल आयार। ओरु बस्केने “स्वतंत्र” मनोर आंतोरा। अदिन काजे चीन ता मध्यम-पूंजीपति वर्ग ता उंदी “स्वतंत्र” ताकि कियाना क्रांति लोप्पा मुख्य भूमिका निभे कियाना ताना विचार, अंगडामे आंदू।

निम्न-पूंजीपति वर्ग- इद वर्ग लोपा भूमिधर-किसान⁴ (भूमि मंदाना किसान) मालिक-दस्तकार ओसो सुडला बुद्धिजीवि लोर - विद्यार्थी, प्राइमरी ओसो माध्यमिक स्कूल कुना गुरुजीलोर, सुडला सरकारी कर्मचारी, दफ्तर कुना चपरासीर, सुडला वकील लोर- ओसो सुडला व्यापारी लोर वांतोरा। इद वर्ग तन्ना संख्या तन्ना वर्ग-चरित्र ता कारण ते वेल्ले ध्यान हियाना लेक्का मंता।

भूमि मंदाना-किसान ओसो मालिक-दस्तकार रेंडासी वर्ग सुडला स्तर ता उत्पादन किया मंतांग। मति इद निम्न-पूंजीपति वर्ग ता अलग-अलग ग्रूप ता उंदी लेक्काडा निम्न-पूंजीवादी आर्थिक स्थिति आंदू, वेंडे ओर किन मुंडू अलग-अलग समूह ते तूसमुडांता। मुन्नेता ग्रूप ते बोनिगा उचुन-उचुन सम्पत्ति मंदिता ओरु वांतोर, इत्तेके शारीरिक लेवेके मानसिक रूप ते मेहनत कीसी तिंडाना-उंडानाए आयवा लेवा सालाना बचत क्रियानोर। इद्रमतोर अमीर बनेमायाला काजे तैयार मंदिंतोर, ओसो मार्शल चाओ⁵ किन मोड़किंतोर। मति ओर किन वेल्ले सम्पत्ति जमा क्रियाना भ्रम हिल्वेकाई मध्यम-पूंजीपति वर्ग ता स्तर एवनल एवला काजे बराबर लालच तोहिंतोर। सुडला सेठ लोरकिन हूडसी ओरा टोड्डि ते उचुल पेसिंता। इद्रमतोरा जीवा कमजोर मंदिता, सरकारी आफिसर लोरकिन वेरियंतोर ओसो क्रांति तुकू वेन्ने उचुन-उचुन वेरियंतोर। बारांकु इत्तेके आर्थिक स्थिति मध्यम-पूंजीपति वर्ग ता पक्काए गरे मंदिता, अदिन के तन्ना प्रचार पोरो वेल्ले विश्वास कींतोर ओसो क्रांति ता बारे ते दुलमुल हरीं पोयंतोर। इद ग्रुप निम्न-पूंजीपति वर्ग लोप्पा कम संख्या ते मंतोर ओसो ताना दक्षिण पक्ष मंदिंतोर। दूसरा ग्रुप लोप्पा मुख्य रूप ते आर्थिक रूप ते आत्मनिर्भर मंदिंतोर। इद ग्रुप मुन्नेता ग्रुप तोरिनकु पक्काए अलग मंता, ओरु धनी बनेमायाला आल्सिंतोर, मति मार्शलचाओ ओरकिन बस्केने धनी बनेमायला हिवोर आंतोर। इदे आयवा उचुक सालकु ने साम्राज्यवादी, युद्ध-सरदार, सामंती जमीन्दार वर्ग ओसो बेहरा दलाल-पूंजीपति वर्ग ता उत्पीड़न ओसो शोषण तिंचि परेशान आसी, इंजेटा दुनिया मुन्नेटा लेक्का हिल्ले रा इंजी, ओरु नेंडु वेन्ने मुन्नेटाचोने मेहनत कीतेके, तन्ना पिस्साला काजे जरूरी कमाई वेने किया परवोर आयनूर इंजी आल्सिंतोर। काम ता घंटा बेरसी कीसी, नरकुम जल्दी तेदना ओसो वेल्ले (वेल्ले समय) काम कीसी तना काम पोरो डब्बल ध्यान हिसीए ओरु पिस्सा परिंतोर। ओरु उचुन-उचुन झगडा क्रियाना शुरू कींतोर ओसो विदेशी लोरकिन “विदेशी दुश्मन”, युद्ध-सरदार लोरिन “लूटी सेनापति” ओसो स्थानीय निरंकुश मानेय ओसो बुरे शरीफजादा⁶ लोरकिन “अत्याचार क्रियाना अमीर” इंतोर। साम्राज्यवादी ओसो युद्ध-सरदार लोरा विरुद्ध आंदोलन कीतेके, ओरु केवल ओना सफलता पोरो डावुट कींतोर (बारांकु इत्तेके विदेशी ओसो युद्ध-सरदार लोर पक्काए शक्तिशाली दिसिंतोर), ओरु तुरंत शामिल आयोर आंतोर, ओसो

बस्केने क्रांति ता विरोध वेन्ने किवोर आंतोरा इद समूह वेल्ले बेहरा मंता ओसो निम्न-पूँजीपति वर्ग ता आधा हिस्सा इदिना लोपा वांता। तीसरा समूह (ग्रुप) ते बोना पिस्वल खराब आसोर दांता ओरु वांतोरा इदिन लोप्पा वेल्लेतोर शामिल मंदितोर, बेस्ता परिवार तल मंदितोर, ओरा पिस्वल तीरम-तीरम सिर्फ पिस्वल पिसाना लेक्काने आंता ओसो ओरा पिस्वल दिया-दिया ते खराब आसोर दांता। हर साल ता आखरी ते हिसाब-किताब कीतेके ओरकिन बेहरा देब्बा दलगिंता, “वेंडे घाटा आता रा.... इंतोर”। बारांकु इत्तेके ओरु बेस्ता दियांग हूडतोर, इंजे हर साल ओरा हालात खराब आसोर दायमंता, कर्जा ता बोजा बेरसा मंता। पिस्वल दिया-दिया खराब आसोर दायमंता, अदिनके ओरकिन “वायना कालम ता बारे ते आल्सतेके ने सांग वेस्सा मंता” मानसिक रूप ते ओरु वेल्ले परेशान मंदितोरा बारांकु इत्तेके ओरा मुन्नेटा कालम ओसो इंजेटा कालम ते वेल्ले अंतर मंता। क्रांतिकारी आंदोलन ते इद्रम तोर वेल्ले महत्वपूर्ण मंदितोरा इद जन-समूह ता संख्या वेल्ले मंता। ओसो वीरु निम्न-पूँजीपति वर्ग ता वाम पक्ष मंदितोरा साधारण समय ते निम्न-पूँजीपति वर्ग ता पोरो वेहता मूंडो ग्रुप क्रांति बगिल अलग-अलग रुख एतिंतांग। मति युद्धकाल ते इत्तेके क्रांति सफल आयानास्के निम्न-पूँजीपति वर्ग ता वाम पक्षे आयवा इद वर्ग ता मध्यम वर्ग वेन्ने शामिल आया परिंता, ओरा दक्षिण पक्ष वेन्ने शामिल आया परिंता, ओसो सर्वहारा, निम्न-पूँजीपति वर्ग ता वाम पक्ष ता महान क्रांतिकारी उभार लोप्पा शामिल आसी, क्रांति ता मदद किया परिंतांग। 30 मई 1925 ता आंदोलन⁷ ओसो हर जागा ता किसान आंदोलन कुना अनुभव तल हुडतेके इद निष्कर्ष सही मंता।

अर्ध-सर्वहारा वर्ग- बद वर्ग किन सर्वहारा वर्ग इंतोर, अदिना लोप्पा पांच रकम मंतांग:

अर्ध भूमि मंदाना-किसान लोरा (अर्ध भूमिधर किसान) वेल्ले संख्या⁸, 2) गरीब किसान, 3) सुडला दस्तकार, 4) दुकान-कर्मचारी⁹ ओसो 5) वेल्लीयसोरे सामान वम्मनोर (फेरीवाले)। अर्ध भूमि मंदाना-किसान लोरा संख्या वेल्ले मंता। वीरु ओसो गरीब किसान लोर कल्सि नाहकुना आम जनता ना वेल्ले बेहरा हिस्सा बनेमांता। किसान समस्या मुख्य रूप ते ओरादे आंदू। अर्ध भूमि मंदाना-किसान, गरीब किसान ओसो सुडला दस्तकार लोर भूमि मंदाना-किसान ओसो मालिक-दस्तकार लोरा संगे कल्सि सुडला स्तर ता उत्पादन किंतोरा। अर्ध

भूमि मंदाना-किसान लोरा बहुसंख्या ओसो गरीब किसान लोर इरवुरासी अर्ध-सर्वहारा वर्ग ते वांतोरा अनि तन्ना आर्थिक स्थिति ता हिसाब ते ओरकिन उच्च, मध्यम ओसो निम्न वर्ग ते तूसमुडांता। अर्ध भूमि मंदाना-किसान लोरा पिस्वल भूमि मंदाना-किसान लोरा पिस्वल तुकू वेल्ले मुशिकल मंदिता, बारंकु इत्तेके हर साल ओरकिन तन्ना जरूरत ता लगभग आधा अनाज ता जरूरी सामान अस्साला लागिता। ओरकिन दुसरोरगडल जमीन लगान ते पोयसी, तन्ना मेहनत ता आधा हिस्सा वमसी, लेवेके सुडला-सुडला व्यापार किसी अद कमी किन पूरा किया लागिता। वसंत कालम ता आखरी ओसो एदी कालम ता शुरू ते पोरकांग कोडसाना मुन्ने ओसो पाडना अनाज मारतास्के, ओरू वेल्ले ब्याज ते कर्जा एतितोर ओसो ज्यादा दाम हीसी अनाज अस्सितोर। भूमि मंदाना-किसान लोरा तुलना ते, ओरकिन दुसरोरा सहायता ता जरूरत लागो आंता, ओरा पिस्वल जरूर मुशिकल ते मंदिता। मति गरीब किसान लोरकिनकले बेस मंदिता। बारंकु इत्तेके गरीब किसान लोरिगा तन्ना जमीन हिल्ले ओसो साल मेंड ता पुहाना-वीतना कित्ता पेरके ओरा कैदे फसल ता आधा हिस्सा लेवेके तानकिनकु वेन्ने कम फसल वांता। अर्ध भूमि मंदाना-किसान लोरकिन लगान ते एतता जमीन तिंचि फसल ता आधा हिस्सा लेवेके कम हिस्सा दोरकिता, इद्रम आतेकाई तन्ना जमीन ता पूरा फसल इत्तेके ओरकिने दोरकिता। अदिन काजे अर्ध भूमि मंदाना-किसान लोरा लोप्पा क्रांतिकारी भावना भूमि मंदाना-किसानलोरकिनकु वेल्ले मंदिता। मति गरीब किसान लोराचोन मन्नो आंता। गरीब किसान नाहकुना मुजारा किसान (tenant peasants) मंदिता, ओरा शोषण जर्मीदार लोर कितोर। तन्ना आर्थिक स्थिति हिसाब ते ओरकिन रेंडु समूह ते तूसमुडांता। गरीब किसान लोरा उंदी समूह लोप्पा तुलना कितेके उंदी समूह नगा खेती कियाना विसरांग (औजार) वेल्ले मंदितांग ओसो उचुन पूंजी वेन्ने मंदिता। इद्रम ता किसान लोरकिन तन्ना सालमेंड ता मेहनत ता आधा हिस्सा दोरकिता। हालवेके उचुन-उचुन ओसो पंटा तेंडितोर। वीरु कीकेंग पोया परितोर, कोर्क-पदिंग पोसे किया परितोर ओसो तन्ना मेहनत ता उंदी हिस्सा वमा परितोर। इद्रमे ओरू पिसितोर ओसो बद्रम तेल्ला साल काटे कियाला आल्लिसंतोर। अदिनके ओरा पिस्वल अर्ध भूमि मंदाना-किसान लोरकिनकले कठिन मंदिता। मति गरीब किसान लोरा दूसरा समूह तुकू बेस मंदिता। वीरा

लोप्या क्रांतिकारी बुद्धि अर्ध भूमि मंदाना -किसान लोरकिनकले ज्यादा मंदिता। गरीब किसान लोरा दूसरा समूह तुकू कम मंदिता। गरीब किसान लोरा दूसरा समूह तोरिगा खेती कियाला जरूरत मंदना औजार मन्नो ओसो पूंजी वेन्ने मन्नो आंता। ओरिगा ज्यादा खेती मन्नो आंता, जमीन तिंचि वेन्ने कम फसल दोरकिता ओसो लगान निहता पेरके ओरिगा वेल्ले कम आमदनी पिसिंता। अदिनके ओरकिन तन्ना श्रमशक्ति ता उंदी हिस्सा वम्मला लागिंता। दुस्कड वातास्के ओसो मौसम खराब आतास्के ओरू सग्गा-सम्बंधी लोरा काल अरिंतोर, नालुंग-हेय्युंग दिव्यांग काटे कियाला काजे उधार तेंडितोर अद्रमासी बोजा कांजना कौदा लेक्का ओरा पोरो कर्जा बेसीरे दांता। किसान लोरा लोप्या सबसे ज्यादा परेशानी वीर किने मंदिता ओसो वीरा पोरो क्रांतिकारी प्रचार ता असर वेने वेल्ले जल्दी अरिंता। सुडला दस्तकार लोरा गिनती अर्ध-सर्वहारा वर्ग ते बारांकु वांता इत्तेके ओरिगा उत्पादन कियाला काजे मामूली साधन मंदिता ओसो ओरू तन्ना कबड खुद कींतोर। वेंडे ओरकिन तन्ना श्रमशक्तिता उंदी हिस्सा हमेशा वम्मा लागिंता अद्रमासी ओरा आर्थिक स्थिति गरीब किसान लोरा संगे कलियंता। परिवार ता ज्यादा बोझा आता कारण ते रहन-सहन ता खर्चा ओसो आमदनी ते फर्क आता कारण ते गरीबी ता बोजा ओसो बेरोजगारी ता वेरिय मंदाना कारण ते ओरा स्थिति गरीब किसान लोरा संगे कलियंता। दुकान ते काम कियानोर कर्मचारी लोरकिन वेल्ले कम तनखाह ते परिवार ता खर्चा ताकि कियाला लागिंता। चीज ता मोला हर साल बेसीरे दांता, मति ओरा वेतन बचोको सालकुने उंदी बेरा बेसिंता। अद्रमे बस्के-बस्के मनाकिन ओरा संगे वडकना मौका दोरकतेके ओरू तन्ना गाडा मॅड दुःख-सुख ता कहानी केंजी कींतोर। ओरा स्थिति गरीब किसान लोर ओसो सुडला दस्तकार लोरा पिस्वल तुकू वेल्ले अलग मन्नो आंता। ओरा पोरो वेन्ने क्रांतिकारी प्रचार ता असर जल्दी आंता। फेरी वालेर मंहगा सामान तेहची फेरी कितेकाई, सडक ओदा स्टाल वाटतेकाई, उचुन पूंजी मंदानोर मंदितोर, ओरकिन पक्काए कम मुनाफा दोरकिता। ओरू तिंदाना-उंडाना खर्चा ओसो केराना खर्चा किया परनाचोन वेन्ने कमाई किया परवोर आंतोर। ओरा स्थिति गरीब किसान लोरकिनकले ज्यादा फर्क मन्नो। ओसो ओरकिन किसान लोरा लेक्का वर्तमान हालात किन सुधरे कियाला काजे क्रांति ता जरूरत मंदिता।

सर्वहारा वर्ग- आधुनिक औद्योगिक सर्वहारा वर्ग ता संख्या लगभग बीस लाख मंता। चीन आर्थिक रूप ते परेके अरसी मंता। अदिनके ताना आधुनिक औद्योगिक सर्वहारा वर्ग ता संख्या वेन्ने ज्यादा हिल्ले। इद बीस लाख औद्योगिक मजदूर मुख्य रूप ते हेयुंग उद्योग- रेलवे, खदान, समुद्री परिवहन, सूती-कपड़ा ओसो जहाज-निर्माण उद्योग- लोप्पा काम किंतोर। ओसो ओरा उंदी बेहरा संख्या इत्तेके विदेशी पूंजीपति लोर मालिक मंदाना कारोबार लोप्पा गुलामी कींतोर। औद्योगिक सर्वहारा वर्ग ता संख्या कम मंता, ओसो अद चीन ता पूना उत्पादन शक्तिंगना प्रतिनिधि कींता। इद वर्ग आधुनिक चीन ता सबसे प्रगतिशील वर्ग आंदू, इद क्रांतिकारी आंदोलन ता नेतृत्वकारी शक्ति बने मांता। हत्ता नालुंग सालकुना हड़ताल लोप्पा, नाविक-हड़ताल¹⁰, रेलवे-हड़ताल¹¹, खाएल्वान ओसो च्याओच्वो ता कोयला खदानकुना हड़ताल¹² लोप्पा, शाम्येन हड़ताल¹³ ओसो 30 मई ता आंदोलन परेके शांघाई ओसो हांगकांग ता आम हड़ताल¹⁴ लोप्पा अदु बद ताकतकिन तोहतायो अदिन पोरो ध्यान हीतेके, मनाकिन तुरंत चीन क्रांति लोप्पा औद्योगिक सर्वहारा वर्ग ता स्थिति ता महत्व समझेमांता। पहला कारण औद्योगिक मजदूर लोर केंद्रीकरण आसी मत्ता कारण ते इद्रमता स्थिति ते मंतोर। जनता ना बदे दूसरा हिस्सा अचोन केंद्रित हिल्ले। दूसरा कारण ओरा आर्थिक हालात बेस मन्नो आंता। ओरिगा ओरा कै-काल ता ताकतकिन विड़सी उत्पादन ता दूसरा बदे साधन मन्नो आंता, ओरू बस्केने धनी बने मायना इंजी आल्सोर ओसो ओरकिन साम्राज्यवादी, युद्ध-सरदार, पूंजीपति लोरा अत्याचार किन भोगेमायला लागिंता। अदिनके ओरू बेसता योद्धा मंदिंतोर। शहर ता कूली लोरा ताकत वेन्ने ध्यान हियाना लेक्का मंता। इदिना लोपा ज्यादातर बोजा कांजना-मजदूर ओसो रिक्शा पिडंगनोर मंदिंतोर। वीरा ग्रुप लोप्पा गटर साफ कियानोर, सड़क साफ कियानोर वांतोर। तन्ना कैकुना सिवाय दूसरा बाताए हिल्ला कारण ते ओरा आर्थिक स्थिति वेन्ने औद्योगिक मजदूर लोरा लेक्काने मंता। मति ओरू केंद्रित मन्नोर ओसो उत्पादन लोप्पा वेन्ने कम महत्वपूर्ण भूमिका निभे कींतोर। चीन लोप्पा इंजे एवनल आधुनिक पूंजीवादी खेती पक्काए कम मंता। बदिन माटु देहाती सर्वहारा वर्ग इंतोमा अदु साल, महिना लेवेके दिया ता हिसाब ते काम कियाना खेती मजदूर वर्ग आंदू ओरिगा जमीन मन्नो, औजार मन्नो ओसो पूंजी वेन मन्नो आंता। ओरू पिस्वल पिसाला

काजे केवल तन्ना श्रमशक्ति किने वमा परितोर। दूसरा मजदुर लोरा हिसाब ते ओरू सबसे ज्यादा घण्टांग काम कींतोर। सबसे कम तनख्वाह दोरकीकींतोर, सबसे खराब परिस्थिति ते पिसिंतोर ओसो ओरकिन काम दोरकना वेन्ने मुश्किल आंता। इद्रम तोर नाहकुना लोप्पा सबसे ज्यादा परेशान मंदिंतोर ओसो किसान आंदोलन ते ओरा जागा गरीब किसान लोरा लेक्काने महत्वपूर्ण मंदिता।

वीरकिन विडसी उंदी वेल्ले बेहरा हिस्सा खानाबदोश (वेल्लसोर मंदानोर) सर्वहारा लोरा मंता। इत्तेके बोर किसान लोरिगा जमीन हिल्ले ओरकिन ओसो काम हिल्ला मंदाना दस्तकार लोरिकिन काम दोरको आंता। ओर सबसे खराब पिस्वल पिसिंतोर। वीर हर जागा गुप्त संस्था बने कीसी मंदिंतोर- इत्तेके फूच्येन ओसो क्वांगतुंग लोप्पा “त्रयी-समाज¹⁶”; हूनान, हुपे, क्वेइचओ ओसो सछवान लोप्पा “दादालोरा समाज”; आनह्वेइ, हनान ओसो शानतुंग लोप्पा “बेहरा-तलवार समाज”; चली ओसो मूंडासी उत्तर-पूर्व इलाकांग लोप्पा “बुद्धिसंगत-जीवन समाज”; शांघाई लोप्पा ओसो दूसरा जागा ने “नीला दल”;¹⁵ इवु शुरुआत ते राजनीतिक ओसो आर्थिक संघर्ष लोप्पा आपसी सहायता कियाला काजे बने कीता संगठन आंदुंगा। वीरा संगे बद्रमता व्यवहार कियाना, इंदानदु चीन ता मुन्ने उंदी मुश्किल समस्या मत्ता। वीरू वेल्ले हिम्मत ते लड़े माया परितोर, ओसो धोखा वेन्ने हिया परितोर। सही नेतृत्व मत्तेके उंदी क्रांतिकारी ताकत वेने बने माया परितोर।

पोरो वेहता पोल्लोंग किन उंदी माटा ते वेहना इत्तेके बोरू साम्राज्यवाद संगे कल्लिस मंदानोर- युद्ध-सरदार, नौकरशाह, दलाल-पूजीपति वर्ग, बड़े जमींदार लोरा वर्ग ओसो ओरा पोरो निर्भर मंदाना बुद्धिजीवि लोरा प्रतिक्रियावादी ग्रूप- मावा दुश्मन आंदू। औद्योगिक सर्वहारा वर्ग मावा क्रांति ता नेतृत्वकारी ताकत आंदू। अर्ध-सर्वहारा वर्ग ओसो निम्न-पूजीपति वर्ग ता सब्बे ग्रूप मना सबसे गेरे ता दोस्त आंदू। दुलमुल मंदाना मध्यम-पूजीपति वर्ग ता दक्षिण पक्ष मावा दुश्मन बने माया परितोर ओसो वाम पक्ष मावा दोस्त बनेमाया परितोर। मति ओरकिनकु हमेशा होशियार मंदाना जरूरी मंता ओसो मावा लोप्पा ओरकिन गड़बड़ पुट्टी कियाला हियनायो।

नोट

1. इग्गा मुट्टा मेंड लज्जा हिल्ला फासीवादी राजनैतिक लोरा उदाहरण हिताद मंता ओरू “चीनी राजसत्तावादी नौजवान संघ” ता स्थापना कीसी मत्तोर, ताना पोरोल पेरके “चीनी नौजवान पार्टी” ताससी मत्तोर। वीरू कम्युनिस्ट पार्टी ओसो सोवियत संघ ता विरोध किन तन्ना प्रतिक्रांतिकारी पेशा बने किसी मत्तोर। ओसो ओरू सत्ता ते मदंना प्रतिक्रांतिकारी ग्रूप ओसो साम्राज्यवादी लोरगडल मदद काजे पैसा एतंदुरा।
2. ताए ची-थाओ लय्योर मंदानास्केने क्वोमिंगतांग लोप्पा शामिल आसी मत्तोर ओसो च्यांग-काई-शेक संगे कलिसीसट्टा-बाजार लोप्पा मुनाफाखोरी कींदूरा। 1925 ते सुन यात-सेन ना डोलता पेरके ओरू कम्युनिस्ट विरोधी आंदोलन शुरू किसी 1927 लोप्पा आता च्यांग काई-शेक ना प्रतिक्रांतिकारी राजविप्लवता काजे विचारधारात्मक आधार तैयार कित्तोर। वेल्ले समय एवनल ओरू प्रतिक्रांतिकारी कामकाज लोप्पा चांग काई-शेक ना वफादार नैदा लेक्का काम कित्तोर। तना शासन खत्म आयाना हूडसी ओरू फरवरी 1949 लोप्पा आत्महत्या कित्तोर।
3. संविधान अध्ययन संघ ता मुखपत्र। उंदी समय ते उत्तरी युद्ध-सरदार लोरा शासन ता समर्थन कियाना ग्रुपनगडल इद संघ उंदी राजनीतिक ग्रूप मत्ता।
4. 1923 ते चीन कम्युनिस्ट पार्टी ता मदद ते सुन यात-सेन क्वोमिंगतांग ता पुनर्गठन कियाना, क्वोमिंगतांग ओसो कम्युनिस्ट पार्टी ता नडमा सहयोग कियाना ओसो तन्ना पार्टी लोप्पा कम्युनिस्ट पार्टी ता सदस्य लोर वेन्ने शामिल आयाला हियाना फैसला कित्तोर। इदे आयवा जनवरी 1924 लोप्पा ओरू क्वांगचओ लोप्पा क्वोमिंगतांग ता पहली राज्य सभा कांग्रेस ता आयोजन कित्तोर। रूस संगे गोती, कम्युनिस्ट पार्टी संगे मदद ओसो किसान-मजदूर लोरा सहायता इंजी तीन महान नीतिंग बने कित्तोर। माओ त्सेतुंग, ली ता-चाओ, लिन पो-छवी, छवी छ्यू-पाए ओसो उचुन कामरेडस् इद कांग्रेस लोप्पा शामिल आतोर। ओरू क्वोमिंगतांग किन क्रांतिकारी हरीं ते तत्ताला काजे महत्वपूर्ण भूमिका निभे कित्तोर। ओरा लोप्पा उचुन मुल क्वोमिंगतांग ता केंद्रीय कार्यकारिणी कमेटी ता रेगुलर लेवके वैकल्पिक सदस्य वेन्ने बनेमातोर।
5. इग्गा कामरेड माओ त्सेतुंग ना अनुसार भूमि मंदाना-किसान इत्तेके मध्यम किसान लोर आंदुरा।

6. कमांडर चाओ ना पूरा पोरोल चाओ-कुंग-मिंग मत्ता। इत्तेके चीनी पीटोंग-वेसूड लोप्पा धन ता भगवान ता पोरोल आंदू।
7. स्थानीय निरंकुश मानेय ओसो बुरे शरीफजादे जर्मीदार वर्ग ता राजनीतिक प्रतिनिधि मत्तोर ओसो ओरू इद वर्ग ता पक्काए खूंखार सदस्य मत्तोर। स्थानीय निरंकुश मानेय ओसो बुरे शरीफजादा लोरा तम्मोर-लेक्का मंदाना धनी किसान लोरा नडमा वेन्ने दोरकितोरा-अनु.
8. 30 मई आंदोलन, 30 मई 1925 ते शांघाई लोप्पा ब्रिटिश पुलिस तोर कित्ता चीन जनताना संहार ता विरुद्ध कीता देशव्यापी साम्राज्यवाद-विरोधी आंदोलन मत्ता। मई 1925 लोप्पा छिंग-ताओ ओसो शांघाई ता सूती-कपडा कारखाना लोप्पा वेल्ले हडताल आतांगा। इव कारखाना ना मालिक लोर जापानी मत्तोर। जापानी साम्राज्यवादी ओसो ओरा पोसे कीता नैकु- उत्तरी युद्ध-सरदार - ओर किन दबे कियाना शुरू कीतोर। 15 मई ते शांघाई ता उंदी जापानी सूती-कपडा मील ता पूंजीपति कू चंग-हुंग पोरोल ता वरोर मजदूर किन तुपाई टूटा संगे हौत्तोर ओसो दस तुकू ज्यादा मजदूर लोरकिन घायल कित्तोर। 28 मई ते छिंगताओ लोप्पा प्रतिक्रियावादी सरकार आठ मजदूर लोरकिन होक्ता। 30 मई ते शांघाई ता दो हजार तुकू ज्यादा विद्यार्थीर विदेशी लोरा पट्टा ते हीता नाहकु ने मजदूर लोरा समर्थन कियाला काजे प्रचार कित्तोर ओसो पट्टा पोरो हीता नाहकुन वापास पोयना आह्वान कित्तोर। ब्रिटिश किन पट्टा पोरो हीता नाहकुना पुलिस-केंद्र ता मुन्ने दस हजार तुकू ज्यादा जनता जमा आतोर। ओरू “साम्राज्यवाद किन खत्म कियाकाल!” ओसो “चीन ता जनता उंदी आयमुट!” इंदाना नारांग हितोर। ब्रिटिश साम्राज्यवादी पुलिस जनता पोरो फैरिंग कीता ओसो बचोनो विद्यार्थी लोरकिन हौत्तोर ओसो घायल वेन्ने कित्तोर। इदे घटना किन 30 मई ता हत्याकांड इंतोमा इद घटना ता कारण ते पूरा देश ता जनता भडकेमाता। हर जागा आता प्रदर्शन ओसो मजदूर, विद्यार्थी ओसो दुकानदार लोरा हडतालकु ताकतांगा। अवु आखिरी ते उंदी बेहरा साम्राज्यवादी विरोधी आंदोलन ता रूप एतितांगा।
9. अर्ध भूमि मंदाना-किसान लोरा वेल्ले संख्या ते इत्तेके कामरेड माओ ना हिसाब ते इगाटा किसान मुख्य रूप ते तन्ना जमीन पोरो काम कियनोर ओसो दुसरोरगडल पोयता जमीन पोरो काम कियाना किसान लोर आंदुर।
10. पाइना चीन लोप्पा दुकान-कर्मचारी अलग-अलग तबकांगनोर मत्तोर। कामरेड माओ इगा ओरा बहुसंख्यक तबका ता उदाहरण हीतोर। दुकान-कर्मचारी लोरा उंदी सुडला तबका वेन्ने मंत्ता, अदु सर्वहारा लेक्काने तन्ना पिस्वल पिसिंता।

11. 1922 ता शुरु ते हांगकांग ता ओडा चले कियानोर ओसो यांगसी डोड्डा ता जहाज कुना मल्लालोर हडताल कित्तोर। हांगकांग ता ओडा ताकी कियानोरा हिम्मत संगे आठ हप्तांग एवनल लडेमातोर। तीव्र ओसो नेतुर लडाई आता पेरके हांगकांग ता ब्रिटिश साम्राज्यवादी अधिकारी लोर मजबूर आसी मजदूरी बेसी कियाना, ओडा चालाक लोरा यूनियन पोरो तल प्रतिबंध हटे कियाना, गिरफ्तार मजदूर लोरकिन विडसना ओसो शहीद लोरा परिवार तोरकु हर्जाना हियाला काजे मांग कित्तोर। ओसो ओरकिन मानेमाया लागता। उच्चुक दिव्यांग पेरके यांगसी डोड्डा ता जहाजकुना मल्ला लोर वेन्ने हडताल शुरु कित्तोर, तानकिन रेंडु हप्तांग एवनल ताकसी आखरी ते सफल कीतोर।
12. 1921 लोप्पा पुटता चीन कम्युनिस्ट पार्टी तुरंत रेल मजदूर लोरा लोप्पा संगठन काम कियाना शुरु कीता। 1922-23 लोप्पा पार्टी ता नेतृत्व ते सबे मेन रेल-लाईनकुना पोरो हडताल आता। इविना लोप्पा सबसे बेस मत्तादु हडताल 4 फरवरी 1923 ते शुरु आसी मत्ता पेकिंग-हानखओ रेलवे ता आम हडताल मत्ता इदु मजदूर महासंघ बने कियाना आजादी काजे कित्तद मत्ता। 7 फरवरी ते ब्रिटिश साम्राज्यवादी समर्थक लोर उत्तरी युद्ध-सरदार ऊ फेइ-फू ओसो श्याआ याओनान क्रूर रूप ते हडताल कियनोरा पोरो हमला कित्तोर। इदिनकिन 7 फरवरी ता तीव्र हत्याकांड इंतोर।
13. खाएल्वान कोयला-खदान ता पोरोल खाएफिंग ओसो ल्वानचओ कोयला खदान किन शामिल कीत्तद मत्ता। हपे इलाका ता इव कोयला खदानकु उंदी व्यापक ओसो आपस ते जुडेमाता कोयला खदान कुना इलाका आंदू। अद समय ते अगा 50 हजार तुकू ज्यादा मजदूर लोर काम कींदुर। 1900 ता ई हो थ्वान आंदोलन ताकनास्के ब्रिटिश साम्राज्यवाद चीन तिंची खाएफंग कोयला खदान किन कब्जा कीसी मत्तोर। पेरके चीनीलोर ल्वानचओ कोयला खदान कम्पनी बने कित्तोर। उचुन दिया पेरके खाएल्वान कोयला खदान किन प्रशासन संगे काल्पतोर। इद हिसाब ते ब्रिटिश साम्राज्यवाद लोर इव रेंडासी ना पोरो तन्ना अधिकार जमे कित्तोर। खाएल्वान कोयला खदान ता हडताल इलाका तुकू पश्चिम इलाका ते शामिल कियमुडाता। च्याओचवो कोयला खदान ता हडताल 1 जुलाई तल 9 अगस्त 1925 एवनल ताकता।
14. शाम्येन क्वांगचओ शहर ता उंदी हिस्सा आंदू अदिन किन ब्रिटिश साम्राज्यवादी अधिकारी लोर पट्टा ते पोयतोर। जुलाई 1924 ते अगाटा ब्रिटिश साम्राज्यवादी अधिकारी लोर पूना पुलिस तोरा अद इलाका लोप्पा दायाना-वायना सबे चीनी जनता किन पास (आईडी) तोहाला लागियर, ताना लोप्पा ओरा फोटो मंदियर इंजी आदेश हीतोर। मति विदेशी लोरकिन अगा दायना-वायना पूरा आजादी

मंदिता। इद नियम ता खिलाफ शाम्येन ना मजदूर लोर 15 जुलाई तिंची हड़ताल शुरू कित्तोर। आखरी ते ब्रिटिश साम्राज्यवाद किन मजदूर आसी इद आदेश किन रद्द किया लागता।

15. 30 मई 1925 ता शांघाई ता घटना पेरके 1 जून ते शांघाई लोप्पा ओसो 19 जून ते हांगकांग लोप्पा आम हड़ताल शुरू आता। दो लाख तुकू ज्यादा मजदूर लोर शांघाई ता ओसो ढाई लाख मजदूर लोर हांगकांग ता हड़ताल ते शामिल आतोर। पूरा देश ता जनता ना समर्थन दोरकी कीसी हांगकांग ता इद हड़ताल लगातार 16 महिनांग एवनल ताकता। दुनिया ता मजदूर आंदोलन ता इतिहास लोप्पा इद सबसे बेहरा हड़ताल आंदू।
16. “त्रयी-समाज”, “दादालोरा समाज”, “बेहरा-तलवार समाज” “बुद्धिसंगत जीवन समाज” ओसो “नीला दल” जनता लोप्पाडा पाड़ना रकम ता गुप्त संगठनकु मत्तांग। ओरा सदस्य मुख्य रूप ते दिवालिया किसान, बेकार मत्ता दस्तकार ओसो आवारा सर्वहारा लोर मंतोर। सामंती चीन लोप्पा वीरू बदे धर्म लेवेके अंधविश्वास ता सामान्य सूत्र ते संगठित आसी दादापंथी ढांचा ता बचोनो संगठन बचोनो पोरोल ते बने कित्तोर। इविना लोप्पा उचुक संगठनकु नगा हथियार वेन्ने मत्ता ओरू इव संगठनकुना संगे सामाजिक जिंदगी लोप्पा वरोनकु-वरोना मदद कियाला आल्सिंदुर। बस्के-बस्के ओरू इव संगठनकुना संगे तन्ना उत्पीड़ित लोकुरा संगे-नौकरशाही ओसो जमींदार लोरा संगे-संघर्ष वेन्ने कियनोर। स्पष्ट रूप ते ड्रम ता निरंकुश शासक लोर कब्जा ओसो इस्तेमाल वेन्ने किया परितोर। अदिनके तन्ना अंधविश्वास-वृत्ति ता कारण ते ओरगडल उचुक संगठन प्रतिक्रियावादी शक्ति वेने बनेमाता। 1927 लोप्पा तन्ना प्रतिक्रांतिकारी राजविप्लव लोप्पा चांग कार्ड-शेक मेहनतकश जनता लोप्पा फूट वाटला ओसो क्रांति ता नाश कियाला काजे ओरा इस्तेमालकित्तोर। शक्तिशाली आधुनिक सर्वहारा वर्ग पुटता पेरके किसान लोर मजदूर वर्ग ता नेतृत्व ते कदम-कदम बिल्कुल पूना किस्म ता संगठन बने कीतोर, इव आदिम ओसो पेरके अरता संगठनकुना अस्तित्व ता बदे कारण हिल्ला लेक्का आता।